



Indgået

15 JUNI 2018

Inatsisartuni ilaasortaq, Sofia Geisler
- / Maani

NAMMINERSORLUTIK OQARTUSSAT
GRØNLANDS SELVSTYRE
INATSISARTUT ALLATTOQARFIAT
BUREAU FOR INATSISARTUT
Box 10 • - 3900 Nuuk

§ 37 naapertorlugu apeqquteqaammut nr. 104-2018 Ittoqqortoormiini nannut pillugit tunngasumut akissuteqaat

Ulloq: 13-06-2018
Sullap normua: 2018 - 12181
Akt nomu: 8021700

Inatsisartut suleriaasissaanni § 37-mi imm. 1 naapertorlugu apeqqutinik Naalakkersuisunut nassiusaqarsimavutit, Ittoqqortoormiini nannut pillugit. Apeqqutitit uanga suliasaqarfigisannut akissassanngortinneqarsimapput.

Postboks 269
3900 Nuuk
Oqarasuaat (+299) 34 50 00
Fax: (+299) 34 63 55
E-mail: apnn@nanaoq.gl
www.naalakkersuisut.gl

1-mut) Ittoqqortoormiini nannut amerliartuinnartut illoqarfiup qanitaanut orniguttalernerannut atatillugu, taamaalilutillu innuttaasunik toqqissisimajunnaartitsinerannut atatillugu, innuttaasut isumannaatsuunissaat pillugu Naalakkersuisut sunik sulliniuteqarpat suliniuteqalersaarpalluunniit?

Naalakkersuisut Kalaallit Nunaanni tamarmi tamatuma ajornartorsiutaanera ilisimallurpaat pingaartumik Ittoqqortoormiit eqqaani, tamaani nannut ajornartorsiutaasartut amerlanerpaat naammattoorneqartarmata. Ittoqqortoormiini piniarnermut aalisarnermullu nakkutilliisoq nannunik sissuertuulluni illoqarfimmiillu ungoorsisarluni suliaqartorujussuvoq.

Najugaqarfinnut nannut qanillattoraangata qanoq iliortoqartarnissaanik Aalisarnermut, Piniarnermut Nunalerinermullu Naalakkersuisoqarfik malittarisassanik suliaqarsimavoq.

Nannut najugaqarfinnut, tassunga ilaallutik savaateqarfinnut, sakkutooqarfinnut ilisimatuseqarfinnut takkukkaangata qanoq suleriaaseqartoqartassanersoq, taamaattoqaraangallu kikkut attavigineqartassanersut pillugit malittarisassani erseqqissumik allaaserineqarpoq. Aamma najugaqarfinnut qaninngortarnerisa millisarnissaanut inassuteqaateqarpoq, tassa nannut nerisassanik toqqorsivinnut, eqqaavinnut il.il. qaninngorniartaramik, naamasaatiginnertik pissutigalugu. Iltersuutit susassaartunut tamanut nassiusuunneqareerput. Taakku aamma Naalakkersuisut nittartagaanni takuneqarsinnaapput.

Naalakkersuisoqarfik immersugassamik suliaqarsimavoq, taannalu inunnik suliffeqarfinnillu nannunik najuqarfinnut orniguttunik naammattoorsisunik immersorneqartassaaq, taamaaliornikkut paasissutissanik aqqissuusassamik katersisoqarniassamat suleriaatsitsinnik aqqiinnissamik takutiisinnaasunik. Nannunik naammattoorsinernik paasissutissanik katersinitsigut aamma qanoq ililluta pitsaaliuinissatsinnik ersarinnerulersitsissaaq.

Inuit, nannut illuutillu ajoqusinnginnissaat anguniarlugu najoqqutassat tamanit malinneqarnissaat pingaaruteqartorujussuvoq.

Taakku saniatigut Pinerluttulerineq pillugu inatsimmi allatut ajornartumik imminullu illersorniarluni iliuuseqarnissamut aalajangersakkat innersuussutigissavakka, tassa Kalaallit

Nunaanni innuttaasunut, ilisimatusartunut, sakkutuunut takomarianullu nannunik ajornartorsiuataasunik naammattoorsisunut tamanut atuummata.

Maanna Naalakkersuisut illuinnarsuutinin kalerrisaarutinin paassaannalinnik misiliinissaq sulissutigineqarpoq, Siriusip qimussinik alapernaarsuisuisa nunallu nanoqarfiusut tamanna pitsaasumik misilittagaqarfigilluarpaat. Ittoqqortoormiini tamatuma misilinneqarnissaa pilersaarusioneqarpoq, atortullu taakku tulluartauppata periarfissap tamatuma sumiiffinnut allanut siaruaannissaat Naalakkersuisut sulissutigissanerlugu nalilerniarpaat.

Naalagaaffiit nanoqarfiusut sinneri Polar Bear Range State-p ataani qanimut suleqatigineqarput, taakku Akerleriinneq pillugu suleqatigiissitaqarput ajornartorsiuatit taakku qaangerniarlugit suliaqartunik. Nannut inoqarfinnut qanillattoraluttuinnarnerinut peqqutit paasiniaarlugit maanna paasissutissanik katersisoqarpoq kiisalu nannut qimaatinniarlugit qunusaarutit suut pitsaanerpaanersut aamma ilanngullugit eqqarsaatigalugit.

2-mut) Ullumikkut 1. januaarimit 31. marts tungaanut nannut piniagaasarnerat Naalakkersuisut sivitsussallugu eqqarsaatersuutigaat?

Naalakkersuisut Tunumi nannunniarluni piffissaliussamik sivitsuinissamut maannamut eqqartuisimangillat, tassa ullumikkut nannunniarneq oktobarip aallaqqaataanit juulip 31-ianut ingerlasarpoq, apeqquteqaammisut januaarip aallaqqaataanit marsip 31-ianut pinnani, tak. Nannunik illersuineq piniarnerlu pillugit Namminersornerullutik Oqartussat nalunaarutaat nr. 21, 22. september 2005-imeersoq.

Nannunik illersuineq piniarnerlu pillugit nalunaarummik nutaamik Naalakkersuisut siunissami qaninnerpaami isummertussaapput. Tassani eqqissisimatitsinerup allanngortinneqarnissaa pilersaarutaanngilaq, tassa aggustip aallaqqaataanit septembarip 31-ianut, piffissarlu taanna pingaarutilimmik neriniarfiusarmat aammalu ukioq taanna piaqqiat eqqissisimaarlutik alliaartussammata.

Inussiarnersumik inuulluaqqusillunga



Erik Jensen
Aalisarnermut, Piniarnermut Nunalerinermullu Naalakkersuisoq